

# He taonga te tamaiti Every child a taonga

**Mahere Rautaki mō te Akoranga Kōhungahunga  
2019-29**

He tuhinga hukihuki

## He whakarāpopototanga

I te mahere o Paengawhāwhā o tēnei tau, i tohua e te Minita Mātauranga he Rōpū Tohutohu a te Minita ki te waihanga i tētahi Mahere Rautaki mō ngā akoranga kōhungahunga.

I mahi tahi te Rōpū Tohutohu a te Minita me tētahi Rōpū Kōrero nō te Rāngai, ā, he mea tautoko tēnei e te Tāhuhu o te Mātauranga. E whakatakoto ana te Mahere Rautaki i ngā whāinga e rima mō ngā akoranga kōhungahunga mō ngā tau 10 e heke iho. E whakatakoto ana tēnei whakarāpopototanga i ēnei whāinga me ngā tūtohutanga whai pānga. Hei pānui i te mahere katoa, te kōrero pūtake me te rārangi wā, haere ki

<https://conversation.education.govt.nz/conversations/early-learning-strategic-plan/>

## Matakitenga

Ko tā ngā whakaakoranga kōhungahunga he whakarite kia tipu ora ai ia tamaiti i ngā wāhi pai rawa e hāpai ana i tōna whakapapa, tōna reo me ngā tikanga, ā, he mea whaihua hoki aua wāhi ki ngā mātua me ngā whānau.

## Te tuku whakahokinga kōrero

He mea nui ki a mātau te whiwhi o whakaaro mō ngā tūtohutanga i roto i tēnei mahere hukihuki i mua o te 15 o Māehe, 2019.

Ka taea te tuku mai mā te rangahau tuihono, mā te tae atu rānei ki tētahi o ngā hui e whakahaerehia puta noa i te motu.



E wātea ana te uiuinga tuihono me ngā mōhiotio mō ngā hui i [www.conversation.education.govt.nz](http://www.conversation.education.govt.nz)


Ka taea anō te īmēra mai, te tuhi mai rānei.



Īmēra: [early.learning@education.govt.nz](mailto:early.learning@education.govt.nz) ka tuhi “Whakahokinga kōrero Mahere Rautaki” ki te rārangi kaupapa



**Tuhia ki:**  
Early Learning Strategic Plan feedback  
Te Tāhuhu o te Mātauranga  
Pouaka Poutāpeta 1666  
Te Whanganui-a-Tara



# Whāinga Me Ngā Tūtohutanga

## Whāinga 1: Ka hikina te kounga mō te tamaiti mā te whakapai ake i ngā paerewa ā-ture

### 1.1 Te whakature i ngā ōwehenga pakeke:tamaiti hou mō ngā pēpi me ngā kōhungahunga

Mā ngā ōwehenga pakeke:tamaiti teitei e taea ai te whakawhitiwhiti a ngā pakeke me ngā pēpi, kōhungahunga hoki. Kāore i te pai ngā ōwehenga pakeke:tamaiti iti rawa mō ngā tamariki i raro i te 3 tau ki te taha o ngā tūtohutanga mai i ngā whakaaturanga me ngā ōwehenga kua whakaritea i ngā whenua OECD ōrite.

E marohitia ana kia whakapikihia ngā ōwehenga o ngā kaiako ki ngā tamariki i raro i te 3 tau i ngā awhe e rua: ki te 1:4 mō ngā tamariki raro i te 2 tau, me te 1:5 mō ngā tamariki 2 tau.

Tau	Kei raro i te 2 tau	2	3, neke atu
Ōwehenga onāiane	1:5	1:10	1:10
Ngā ōwehenga e marohitia ana	1:4	1:5	1:10

**Kia mōhio:** Ka tātaihia ngā ōwehenga pakeke:tamaiti puta noa i te pokapū whai raihana katoa, ā, kāore e herea kia whakarōpūtia ngā tamariki mā te taipakeke.

Ka āta whakaurua tēnei huringa, ā, ka tīmata mā ngā pūtea nui ake hei whakatenatena i te ōwehenga hou mō ngā tamariki i raro i te 2 tau, whai muri ake ko te ture. Whai muri mai, me whakapoapoa ā-pūtea mō te ōwehenga 2 tau te pakeke, kātahi ka whakaturea.

### 1.2 Te here i ngā ratonga akoranga kōhungahunga ki te tautoko i ngā whanaungatanga pūmau mō te tamaiti

E ai ki ngā rangahau me whai te tamaiti i ngā hononga haumaruru, pūmau, pāhekoheko hoki me ngā pakeke.

E marohitia ana kia herea ngā ratonga akoranga kōhungahunga hei whakaatu ka pēhea te tautoko a ngā kaiako o te whakahaere i ngā pēpi me ngā kōhungahunga kia whai wāhi ai ki ngā manaakitanga pūmau, ōrite hoki. Me whakaatu ka pēhea tā rātau tautoko i ngā whakawhitinga pai mō te tamaiti me tōna whānau. Ka mahi tahi te Tāhuhu o Te Mātauranga me te rāngai akoranga kōhungahunga hei tuari i ngā taura pai o ngā tikanga whaitake.

### 1.3 Te whakapoapoa mō te 100%, ā, ka whakature mō te 80% o ngā kaiako whai tohu<sup>1</sup> i roto i ngā pokapū whai kaiako, e eke ai ki te 100%

He tino tautoko ngā tohu kaiako i ngā tikanga kounga, hei taura, kia āhei ai ngā whakawhitiwhiti kounga tiketike me ngā tamariki.

E marohitia ana kia whakapikihia te ōrau o ngā kaimahi e hiahia ana e whai tohu ana i roto i ngā ratonga ā-kaiako, ā-pokapū mai i te 50% ki te 80% hei te tau 2022, ā, ka neke atu ki te 100%. I te wā kei ngā wāhi wehe kē ngā tamariki, me noho kia kotahi te kaiako whai tohu i te iti rawa i te taha o ia rōpū.

Ka āta whakaurua mai tēnei huringa, ā, ka tīmata atu i ngā whakapoapoa tuku pūtea mō te 100% o te whai tohu.

<sup>1</sup> I roto i tēnei horopaki, ko te tikanga o te whai tohu he whai i tētahi tohu whakaako kōhungahunga e whakamanahia ana e te Matatū Aotearoa (tirohia te ture 3 i roto i te Education (Early Childhood Services) Regulations 2008). Ko ngā tāngata katoa whai kawenga me te 50% o ngā kaimahi katoa i ngā ratonga pokapū ā-kaiako me whai tohu (whakaritenga 44) <http://www.legislation.govt.nz/regulation/public/2008/0204/latest/DLM1412611.html> me te (kupu āpiti 1). <http://www.legislation.govt.nz/regulation/public/2008/0204/latest/DLM1412635.html> Me whai Ngā Tāngata Whai Kawenga i tētahi tiwhikete mahi onāiane. Mō te kaupapa o te whai pūtea, me mātua whai tiwhikete mahi onāiane ngā kaimahi katoa e uru ana ki te tatau o ngā haora kaimahi (Pukamahi Tuku Pūtea a Te Tāhuhu o Te Mātauranga).

#### 1.4 | Te whakawhanake tohutohu mō te nui o te rōpū, te hoahoa o ngā taiao me ngā āhuatanga taiao

E kitea ana te hono o ngā rōpū iti ki te kounga pai ake, otirā mō ngā tamariki nohinohi me ērā e noho ana i ngā āhuatanga mōrea nui. Waihoki, ko ngā wāhi mahana, wāteatea me te tuku i ngā tamariki kia whai wāhi atu ki te ao tūroa he mea hira mō te oranga me te akoranga o ngā tamariki. E kī ana ngā rangahau ko te rahinga rōpū me te rahi me te hoahoa o ngā wāhi hanga he pānga tētahi ki tētahi.

E marohitia ana kia whakawhanake i ngā tohutohu matawhānui, tōpū hoki mō ngā nohonga i waenga i te rahinga rōpū me ngā raruraru taiao whānui, ā, me pēhea te whakapai ake i ngā paerewa kounga i ēnei wāhi. Mēnā ko te mutunga atu he marohitanga mō ngā huringa whakaritenga, me whai whakaaro anō ki ngā pānga pūtea.

#### 1.5 | Kāhītitia Te Whāriki hei tautoko i ngā tūmanako ōrite

E marohitia kia kāhītitia ngā mātāpono, aho, whāinga me ngā putanga kei roto i te marautanga akoranga kōhungahunga, *Te Whāriki: He whāriki mātauranga mō ngā mokopuna o Aotearoa*. Ka whakakahatia e te kāhītitanga te tūnga ā-ture o *Te Whāriki* e mārāma ai ngā hiahia kia whai wāhi te tamaiti ki tētahi marautanga hōhonu, whakamana hoki.

#### 1.6 | Te ārai i ngā kaituku ratonga kounga iti kia kore ai e whakatuwhera ratonga atu anō

I tēnei wā e āhei ana ngā kaituku ratonga koretake ki te whakatū ratonga hōu, me ū noa iho ki ngā paerewa raihana i te wā ka whakatuwherahia.

E marohitia ana kia herea ngā kaiwhakarato ratonga onāiane mō tētahi ‘whakamanatanga hei whakawhānui’. Me whakaatu e rātau kei a rātau ngā pūmanawa kaiako, poari kaitiaki, tumu whakahaere hoki e hiahiatia ana. Nā tēnei kua kore e āhei ngā kaiwhakarato ratonga koretake te whakawhānui mēnā kāore he whakamanatanga.

#### 1.7 | Te whakapiki i te aroturuki ratonga

E marohitia ana kia whakauru i tētahi rārangi kaupapa o te aroturuki ōrite, pākaha hoki, tae atu ki te toronga ohore a te Tāhuhu o Te Mātauranga, te Tari Arotake Mātauranga (ERO) rānei. Me whakamōhio atu te ratonga i ngā mātua, whānau rānei ina ka eke ki tētahi raihana takitaro, me te whakamārama he aha i pērā ai, ā, ka pēhea te whakarite. Ina auau ana te eke ki tētahi raihana takitaro, ka taea ngā ture te panoni kia āhei ai ki te whakakore i te raihana o te ratonga. Ki te puta ngā māharahara nui mō tētahi ratonga arotakehia tonu pea ngā raihana katoa o tētahi kaiwhakarato ratonga.

## Whāinga 2: Ka pakari ia tamaiti mā te āhei atu i te wā tika ki ngā rauemi e hiahiatia ana kia momoho ia

### 2.1 | Me mātua whakarite kia tautoko te pūtea tōkeke i te tamaiti e whai matea ana

E tuku pūtea tōkeke te Kāwanatanga i tēnei wā me ngā pūtea matawhāiti mō ngā whakatikitanga hei tautoko i ngā tamariki kia haere ki ngā ratonga kouna tiketike me te whai tautoko akoranga ina e hiahiatia ana. E marohitia ana kia arotakehia ēnei pūtea hei whakarite ka tino tautokona ngā tamariki kia whai hua i te whakauru mai. Kei roto i te arotake te rahinga pūtea me te āhua o te tohatoha.

### 2.2 | Te hanga ngātahi i ngā utauta kauneke hei tautoko i te ako me te oranga o ngā tamariki

I tēnei wā he iti noa ngā utauta kia mōhio ai ki te anga whakamua o te tamaiti puta noa i te kaha e whakaahuahia ana i *Te Whāriki*. Ko te tikanga ka hiahia tautoko ētahi atu tamariki i ngā wāhi pērā i te hauora, oranga, reo rānei.

E marohitia ana kia mahi tahi te Tāhuhu o Te Mātauranga me te rāngai akoranga kōhungahunga ki te hanga ngātahi i ngā utauta hāngai, tika, tōtika ā-ahurea mō te aromatawai i te akoranga me te whanaketanga o te tamaiti i roto i te pou tarāwaho o *Te Whāriki*. Ka whakarato ēnei utauta i ngā tohutohu tōtika hei tautoko i te akoranga me te oranga o te tamaiti, ā, ka mōhio anō mēnā e hiahiatia ana ngā tautoko mātanga, ētahi atu whakataunga hoki.

### 2.3 | Te whakawhānui i te maha o ngā ratonga akoranga kōhungahunga e taupua ana i ngā ratonga pāpori tauawhi hei tautoko i ngā tamariki me ō rātau whānau

Ka mahi tahi te Tāhuhu me te rāngai akoranga kōhungahunga me ētahi atu tari hei tautuhi i ngā taurira whitake o ngā ratonga akoranga kōhungahunga e āwhina ana ki te tonono ratonga pāpori me te hauora. Kei roto pea i ēnei ratonga he toronga nā te nēhi hauora tūmatanui, me te uru a te iwi me te Māori ki ngā kaupapa penapena moni me te hauora hinengaro. Ka tuari mōhiohio te Tāhuhu mō te āhua o te mahi a ngā kaupapa tōpū momoho i roto i ngā hapori kanorau.

### **Whāinga 3: Ko te haumi ki tō tātau ohu mahi he tautoko i te hiranga o te whakaako me te ako i roto i ngā ratonga katoa.**

#### **3.1 | Te whakapai ake i te ōrite me te taumata o ngā utu ā-tau a ngā kaiako me ngā here puta noa i te rāngai akoranga kōhungahunga**

Nā te rerekē o ngā utu ā-tau me ngā āhuatanga mahi i roto i te rāngai akoranga kōhungahunga ka nui te mutumutu o ngā kaimahi me te aukati i ngā whai wāhitanga o ngā kaiako ki te hanga mahere mō te akoranga o ngā tamariki. Kāore he painga o ēnei putanga ki ngā tamariki.

E marohitia ana kia waihangatia tētahi tikanga e tautoko ai te kāwanatanga mō ngā utu ā-tau me ngā āhuatanga ōrite ake, pai ake hoki i te rāngai akoranga kōhungahunga. Ka āwhina anō tēnei i ngā ratonga me ngā tamariki tino maha mai i ngā āhuatanga uaua kia kukume mai i ngā kaiako matatau, tino mōhio hoki.

#### **3.2 | Te whakakaha i te Mātauranga Kaiwhakaako Tīmata (ITE)**

Kua tīmata kē ngā mahi ki te whakapai ake i te mātauranga tuatahi o ngā kaiako.

E marohitia ana kia mātua whakamanahia ngā kaiako hou e te mātauranga tuatahi ki te tino whakatinana i te whakatinana i *Te Whāriki*. Ka whakaritea ngā raruraru o te āhei atu, kounga rerekē o ngā tohu e wātea ana, ngā ara maha ki te whakaako, me te kanorau o ngā kaiako. E tūtohua anō kia tukuna ngā akoranga me te whanaketanga ngaio (PLD) hei āwhina i ngā ratonga ki te tautoko i ngā kaiako ākonga.

#### **3.3 | Te whakapai ake i te akoranga me te whanaketanga ngaio**

E marohitia ana kia waihangatia he aronga ukauka, i āta maheretia hoki te PLD hei whakakaha i ngā pūmanawa me te whaitake o ngā kaiako me ngā kaiārahi. Ka tautoko te PLD i te whakatinanatanga o te marautanga, te mōhio ki te ao Māori me te mārāma ki te reo Māori, te mātau ki te ahurea, te matihiko me te kaiarahitanga.

#### **3.4 | Te whakawhanake i tētahi rautaki puna ohu mahi**

E marohitia ana kia waihangatia he rautaki puna ohu mahi e whai ana i ngā ara rerekē e tutuki ai ngā tohu akoranga kōhungahunga.

Ka whakawhānui i te kaupapa karahipi onāiane e whakarato ana i ngā utu me ngā utu tāpui mā ngā ākonga akoranga kōhungahunga kei ngā kaupapa ITE paetahi, paerua hoki me te kukume mai i ngā ākonga Māori, Te Moananui-a-Kiwa.

Ka mahi anō te Tāhuhu o Te Mātauranga i te taha o te rāngai ki te whakapai ake i ngā raraunga mō te ohu mahi o te akoranga kōhungahunga.

## Whāinga 4: Mā te whakamahere ka uaratia, ka rawaka, ka kanorau te whakaratonga

### 4.1 Te whakawhanake me te whakauru mai i tētahi tukanga hei whakarite mēnā e hiahiatia ana he ratonga akoranga kōhungahunga hou

I tēnei wā ka āhei ki te whakatū i ngā ratonga akoranga kōhungahunga, ā, me ū noa iho ki ngā whakaritenga tuku raihana. I ētahi wāhanga tērā ka nui ake, ka iti iho rānei ngā pukenga e hiahiatia ana, kāore rānei e pai rawa ngā whakaratonga mā ngā mātua, whānau hoki.

E marohitia ana kia whakaetia anake ngā tono hou mō tētahi raihana i ngā wāhi e hiahiatia ana he ratonga hou.

### 4.2 Te whakarato tautoko ki te poari me te tumu whakahaere mō ngā ratonga ā-hapori

Ka tukuna ngā tohutohu me ngā tautoko atu anō ki ngā ratonga ā-hapori hei whakapakari i te poari kaitiaki me te tumu whakahaere. Kei roto i tēnei ko te whai rauemi atu anō, te whakangungu, me te tautoko kanohi ki te kanohi mō te whakapakari hōhonu.

### 4.3 Te tautoko i te whakatūnga me te tautiaki i ngā ratonga akoranga kōhungahunga kei runga i ngā whenua o te Karauna e whakahaerehia ana e Tāhuhu o Te Mātauranga

Ka mātua whakarato wāhi te Tāhuhu mō ngā ratonga kura kōhungahunga i te taha o ngā wāhi kura tuatahi hou ina taea ai. Ka āwhina tēnei i ngā ratonga hou ki te tuitui i ngā hononga hou ki ngā kura.

Ka āta whakamārama anō te Tāhuhu i ngā herenga mō ngā rīhi onāiane, me te kawenga mō te tiaki i ngā whare.

### 4.4 Te hanga ngātahi i tētahi tauira tuku pūtea tika me Te Kōhanga Reo National Trust

He kaupapa whanaketanga Māori Te Kōhanga Reo, e aro ana ki te pupuri me te whakakaha i te reo Māori me ngā kaupapa whakaaro i roto i tētahi pou tarāwaho i kōkiritia e ngā kaumātua i te tau 1982. Hei tautoko tonu i tēnei tino kaupapa, ka hoahoa ngātahi te Tāhuhu o Te Mātauranga i tētahi tauira tuku pūtea tika me Te Kōhanga Reo National Trust e ū ana ki ngā whakataunga a Te Rōpū Whakamana i Te Tiriti o Waitangi e ai ki tā rātau kokoraho.

### 4.5 Te hanga ngātahi i tētahi tauira tuku pūtea tika me te Playcentre Federation

He tauira ratonga akoranga kōhungahunga ahurei te Rōpū Tākaro nō Aotearoa e whakapono ana ko ngā mātua ngā kaiwhakaako tuatahi, pai rawa hoki i ā rātau tamariki. Ko te tikanga he iti iho ngā utu kaimahi ki ngā ratonga ā-kaiako i te mea ko ngā mātua, whānau rānei ngā kaiwhakaako pai rawa. Kāore pea e tino kitea ngā utu whakahaere i roto i te tauira tuku pūtea onāiane. Hei tautoko tonu i ngā rōpū tākaro hei āhuatanga hira o te whakaratonga, ka hoahoa ngātahi te Tāhuhu o Te Mātauranga i tētahi tauira tuku pūtea tika.

### 4.6 Me whai whakaaro ki te whakatū ratonga akoranga kōhungahunga a te kāwanatanga me tētahi kaupapa rangahau whai pānga

I ētahi hapori, kāore pea e wātea mai ngā ratonga akoranga kōhungahunga iti te utu, kounga tiketike, urupare ā-ahurea hoki.

E marohitia ana kia whakaarohia te whakatū i ngā ratonga akoranga kōhungahunga whai pūtea, a te kāwanatanga.

Ka taupua ēnei ratonga i te whakamahinga i ngā ratonga pāpori me te hauora tauawhi hei tautoko i ngā mātua me ngā whānau me te oranga o ngā tamariki. Ka taea hoki te whai kaupapa rangahau, kia piki ake te mōhiotanga, te māramatanga hoki mō te tautoko i te oranga, me ngā whakawhitinga ki te kura.

## **Whāinga 5: Ka auaha, ka ako, ka whakapai haere tonu te pūnaha akoranga kōhungahunga**

### **5.1 | Te whakatū i ngā pokapū auahatanga mō ngā akoranga ratonga kōhungahunga**

E marohitia ana kia tuku kirimana te Tāhuhu o Te Mātauranga kia hangaia ngā pokapū whanaketanga auahatanga. E pohewatia ana ēnei hei wāhi e taea ai e ngā ratonga te tiki i ngā pūkenga auahatanga me ngā pātui rangahau.

### **5.2 | Te tautoko i ngā ratonga akoranga kōhungahunga ki te mahi tahi ki ētahi atu ratonga mātauranga**

He mea nui te mahi tahi mō te tuari i ngā tikanga pai me te tautoko i te whakawhitinga ki te kura.

E marohitia ana kia tukuna te tautoko mō ngā ratonga akoranga kōhungahunga kia whai wāhi atu ai ki ngā kura i roto i Ngā Kāhui Ako, ā, kia whakauru atu hoki ki ētahi kaupapa mahi tahi puta noa i te rāngai, i waenga hoki i ngā rāngai.

### **5.3 | Te tautoko i ngā arotakenga ā-roto kaha, kia pakari haere tonu ai**

E marohitia ana kia mahi tahi te Tāhuhu o Te Mātauranga me ERO ki te tautoko i ngā ratonga ki te arotake i ā rātau ake mahi. Ka whakakaha tēnei i te whakamahinga o Te Whāriki me te whakarite kia pai ake, kia pai ake.



## He aha ngā hua mā ngā mātua me ngā whānau

### Te hiki i te kounga

Ko tā tēnei mahere he whakapai ake i te kounga tiaki tamariki, whakaako me ngā akoranga o ngā tamariki i roto i ngā ratonga akoranga kōhungahunga.

Mā ngā ōwhehenga pakeke:tamaiti pai ake, te whakapiki i te maha o ngā kaiako whai tohu, me te whakarite kia ōrite te taumata tiaki tamariki e pai ake ai ngā whakawhitiwhiti urupare ake me ngā pakeke e tautoko ana tā rātau ako, whanaketanga hoki.

Mā te haumi ki te ohu mahi mātauranga kōhungahunga ka rawaka ngā kaiako me ngā kaiwhakaako matatau, ka mutu e whakaata ana rātau i te kanorau whānui o te iwi o Aotearoa. Mā te ōrite o ngā utu ā-tau me ngā āhuatanga o ngā kaimahi e pai ake ai te kukume mai me te pupuri i ngā kaiako. Mā ngā āhuatanga pai ake ka whai wā pea kia hui tahi ngā kaiako me ngā whānau ki te whakamahere marautanga me te tuari mōhiohio mō ngā tamariki.

Mā te tautoko i ngā rangahau me te auahatanga ka pakari ake te rāngai akoranga kōhungahunga ki te tautoko i ngā tamariki, mātua, whānau hoki.

### Te whakapai ake i te tōkeke

I tēnei wā e tuku ana te Tāhuhu i ngā pūtea tāpiri ki ngā ratonga akoranga kōhungahunga hei tautoko i ngā hāpori e pēhia ana e ngā uauatanga. E marohitia ana kia arotakena ēnei pūtea kia tika ai te rahi hei tautoko i ngā tamariki whai matea. Mā te tūtohutanga kia waihangatia ngā utauta anga whakamua e āwhina ngā kaiako ki te aromatawai i te ako me te oranga o ngā tamariki kia hāngai ai te mātauranga ki ō rātau ake hiahia. Mā te takawaenga i te whakawhānuitanga o ngā ratonga pāpori tauawhi ka pai ake te tautoko i ngā tamariki me ngā whānau.

### He kōwhiringa pai ake

E marohitia ana ka āta whakauru atu te Tāhuhu o Te Mātauranga ki ngā whakariterite ki hea tū ai ngā ratonga hou, e ai ki ngā taupori me ngā momo ratonga e uaratia ana e ngā mātua, whānau hoki. Ko te koronga kia whakapakaritia te reo Māori hei tautoko i te ara o ngā tamariki ki ngā kura arareo Māori.

I ētahi wā, nā ngā whakatau pea a te Minita mō te wāhi me ngā momo ratonga ka whakatuwherhia i ngā wāhi ake ka iti iho pea ngā kōwhiringa e katia ai tētahi ratonga koretake, ka aukatia rānei te whakawhānui a tētahi kaiwhakarato.

Ko tā te arotake pūtea mā ngā kōhanga reo me ngā pokapū tākaro he whakarite kia mau tonu ai, kia kaha ake ai ēnei ratonga hira. Ko te whāinga o ngā tautoko poari kaitiaki me ngā whakahaere mā ngā ratonga ā-hāpori, he whakapai ake te tautoko i ngā kaupapa a ngā matua me ngā hāpori.

### Ka nui ake te utu ki ngā mātua me ngā whānau?

I tēnei wā he \$1.8 piriona ngā whakapaunga a te kāwanatanga i te tau mō ngā ratonga akoranga kōhungahunga. Ka utua ēnei pūtea ki ngā ratonga mā ngā utu tāpui mō ngā haora e haere ai ngā tamariki tae ake ki te 30 haora i te wiki (6 haora i te rā). He nui ake te taumata whiwhi pūtea mā ngā tamariki pakeke atu i te 3 tau mō te 20 haora i te wiki ('20 haora ECE'). Ka tuku nama anō te nuinga o ngā ratonga, ka tonu pūtea tāpiri rānei mai i ngā mātua. Ahakoa nā te kāwanatanga ngā ratonga i whakature, i utu hoki, he hinonga motuhake kei raro anō hoki i ā rātau whakahaere.

Ka piki te utu mō ngā ratonga akoranga kōhungahunga nā te maha o ngā tūtohutanga i roto i tēnei mahere hukihuki. Ko te koronga o tēnei mahere hukihuki he mau tonu i te utu mā ngā mātua, ka pai ake rānei aua āhuatanga e aukatia ana te taetae atu e te nui o te utu. Mēnā ka tutuki ēnei tūtohutanga, me whai pūtea tāpiri atu anō mai i te kāwanatanga.

Ko te kaupapa o tēnei mahere hukihuki he whakamātautau i te kaha o te tautoko mō ia tūtohutanga. Ina whiwhi ngā urupare he mahi anō kei mua hei whakatutuki, hei whakamahere i te whakatinanatanga o ngā kaupapa hou.

## **Ka kitea te aha mēnā ka tutuki te mahere**

Ka mōhio kua tutuki te mahere ina:

1. E āhukahukatia ana te tamaiti hei taonga, ā, he motika tōna me te whai motika ki tētahi ao pai i roto i ngā tūwāhi kounga teitei e tautoko ana i tōna mātauranga whānui, oranga hoki.
2. Ka taea e ngā tamariki katoa te whai wāhi i ngā ratonga akoranga kōhungahunga e urupare ana ki ngā hiahia, uara me ngā tūmanako o te whānau.
3. Ka whai wāhi atu ngā tamariki katoa ki tētahi marautanga hōhonu e tautoko ana i ngā putanga kaha, tōkeke hoki, e ū ana ki ngā tūmanako o Te Whāriki.
4. E mātau ana ngā kaiako me ngā kaiwhakaako ki ngā tikanga ahurea, ka mutu ka taea e rātau te Māori te tautoko kia puta ai o rātau ihu, te whakatairanga me te whakaū i te ao Māori me te tautoko i te tuakiri, reo, ahurea hoki o ngā tamariki katoa.
5. Ko te mahi i roto i ngā ratonga akoranga kōhungahunga tētahi mahi e tino tōminatia ana.
6. Ko te akoranga kōhungahunga he rāngai auaha, he ako, he whai i te hiranga.
7. Mā te māramatanga ki ngā āhuatanga o te tamaiti me tana ako ka māmā ake te whakawhiti ki te kura.

## **Te whakatinanatanga e marohitia ana**

E whakawhirinaki ana ngā whāinga me ngā tūtohutanga i roto i tēnei mahere hukihuki tētahi ki tētahi, ā, ka tārai i te hoahoa o te rāngai akoranga kōhungahunga anamata. E tautuhi ana te whakatinanatanga e marohitia ana i te roto i te wā poto, wā tata, wā roa hoki e whakaterere ana i te ara e tutuki ai i a tātau te matakitenga o tēnei mahere.

## **Ngā whakapae**

Kei te tatari te whakatinana i ngā tūtohutanga a te Mahere Rautaki whakamutunga ki te whakaaetanga a te Rūnanga Matua ki ngā kaupapa marohi takitahi me ngā tukanga Tahua ā muri ake.

# Mahere Rautaki Akoranga Kōhungahunga

## Te whakatinanatanga e marohitia ana

### WĀ POTO

### WĀ WAWAENGA

### WĀ ROA

Whāinga 1	Whāinga 2	Whāinga 3	Whāinga 4	Whāinga 5
<p><b>Te hiki i te kōunga mō te tamaiti</b></p> <p>Te whakapoopa kia 100% ngā kaiako e whai tohu ana i ngā pokapū ā-kaiako</p> <p>Te waihanga tohutohu mō te rahi o ngā rōpū me ngā wāhi</p> <p>Kāhīttia <i>Te Whānaki</i> hei tautoko i ngā tūmanako tūhonohono</p> <p>Te ārai i ngā kaituku ratonga kōunga iti kia kore ai e whakatuwhera ratonga atu anō</p> <p>Te whakapiki i ngā ratonga aroturuki</p>	<p>Ka mātua whakarite kia tautoko te pūtea tōkeke i te tamaiti e whai matea ana</p> <p>Te hanga ngātahi i ngā utauta kauneke hei tautoko i te ako me te oranga o te tamaiti</p> <p>Te whakawhanui i te maha o ngā ratonga akoranga kōhungahunga e tautoko ana i ngā ratonga pāpori tauawhi</p>	<p>Te whakapai ake i te orite me te taumata o ngā utu ā-tau a ngā kaiako me ngā here mahi</p> <p>Te whakakaha i te Mātauranga Kaiwhakaako Tīmata</p>	<p>Te whakawhanake me te whakauru mai i tētahi tukanga hei whakarite mēnā e hiahia ana he ratonga akoranga kōhungahunga</p> <p>Te tautoko i te whakātū me te tautiaki i ngā ratonga akoranga kōhungahunga kei runga i ngā whenua o te Tāhuhu</p> <p>Te whai whakaaro ki te whakatū i ngā ratonga akoranga kōhungahunga ā-kāwanatanga</p>	<p>Te tautoko i ngā ratonga akoranga kōhungahunga ki te māhi tahi me tētahi atu ratonga mātauranga</p> <p>Te tautoko i ngā arotakenga ā-roto pakari kia mōhio ai te kai te pai i haere te mahi</p>
<p>Te whakapoopa, ā, ka whakature i ngā ōwehenga pakeke tamaiti i raro i te 2 tau pakeke tamaiti mō ngā tamarii 2 tau te pakeke</p> <p>Te whakature kia 100% ngā kaiako e whai tohu ana i ngā pokapū ā-kaiako</p>	<p>Te whakapoopa, ā, ka whakature i ngā ōwehenga pakeke tamaiti i raro i te 2 tau pakeke tamaiti mō ngā tamarii 2 tau te pakeke</p> <p>Te whakature kia 100% ngā kaiako e whai tohu ana i ngā pokapū ā-kaiako</p>			



**Whakaputahia ō whakaaro mō te anamata o te mātauranga**

**Kōrero**

**Mātauranga**

**Me kōrero tātou**

---

**Whakaputahia ō  
whakaaro mō  
te anamata o  
te mātauranga**

---

**Whakauru mai ki ngā  
kōrero**  
[conversation.education.govt.nz](http://conversation.education.govt.nz)



#EdConvo

#EarlyLearning10

---

Published by the Ministry of Education, New Zealand, November 2018.

Mātauranga House, 33 Bowen Street  
PO Box 1666, Thorndon  
Wellington 6140, New Zealand.

[www.education.govt.nz](http://www.education.govt.nz)

Crown copyright © 2018

ISBN 978-1-77669-521-8 (PRINT)  
ISBN 978-1-77669-520-1 (ONLINE)